

PELAJAR 12

ROH KUDUS

Sepengudah Jesus angkat ari pemat, Iya ngayan ka diri ngagai bala rasul sepengelama 40 hari. Lebuh maya sida dibai Iya betugung bebala mayuh di atas bukit, Iya diangkat ke serega ba mua sida (bacha Kereja Rasul 1:1-11). Tang sebedau nya, Jesus bejanji naka ia manah.

“Aku deka minta ari Apai, lalu Iya deka meri ka kita Penyaup siko, Roh Pemendar, meruan ba kita belama..... Enggau bendar aku madahka kita: manah agi ka kita enti aku nadai enggau kita, Penyaup enda datai ngagai kita. Tang enti aku ninggal ka kita, nya baru aku deka ngasuh iya datai ngagai kita.....” (John 14:16-18; 16:5-7).

Jesus enda ninggalka kitai kediri ba dunya tu, tang Iya ngirum Roh Kudus ngagai kitai.

A. ROH KUDUS NYA ENDANG ALLAH TAALA EMPU

Pekara ti lumbur satu patut kitai mereti tentang Roh Kudus ianya Iya endang Tuhan.

Ko Peter bejaku enggau iya, “Ananias, nama kebuah nuan ngasuh Sitan bekuasa dalam ati nuan lalu ngasuh nuan ngemula ka ROH KUDUS.....Nuan ukai ngemula ka mensia, tang nuan ngemula ka TUHAN.” (Kereja Rasul 5:3,4). Peda mega 2 Korint 3:17.

Tuhan milih mensia endur Iya mandang ka diri ti APAI, ti ANAK lalu ti ROH KUDUS. Utai tu dikena nunjukka ari gaya pendiau mensia alai ketiga-tiga sida nya siti.

B. PEMERI ARI ROH KUDUS

Roh Kudus ianya pemerri ari Tuhan ngagai siko-siko orang ti arap. Lebuh siko-siko orang arap ka Jesus lalu nerima selamat ti dijanjika Iya, Roh Kudus datai lalu idup dalam iya, meri pengidup ngagai roh iya.

Ko Peter bejaku enggau sida, “Ngesal sereta lengka ka dosa kita, genap iko kita, lalu baptisa dalam nama Jesus Kristus; awak ka dosa kita di-ampun; lalu kita deka nyambut pemerri Allah Taala-Roh Kudus. Laban semaya Allah Taala udah digaga enggau kita sereta enggau bala anak kita, lalu enggau semua sida ti dudi ila-semua sida ti dikangau Allah Taala datai ngagai Iya.” (SPKR 2:38.39; John 7:37-39).

C. PENGAWA ROH KUDUS

1. Dalam Pendiau Pengidup Orang Ti Bepengarap

Roh Kudus datai dalam pengidup orang ti bepengarap ti mela iya secara peribadi.

a. Iya nyadi saksi kaul kitai enggau Kristus.

“Roh Allah Taala besaum enggau ati kitai, nentu ka kitai anak Allah Taala” (Rom 8:16). Peda mega 1 John 3:24.

- b. Iya ngajar kitai**
 “Penyaup, ianya Roh Kudus, ti deka di asoh Apai dalam nama aku, deka ngajar kita genap bengkah utai, lalu ngasuh kita ingat ka semua utai ti udah di-ajar aku ngagai kita” (John 14:26).
- c. Iya ngiring kitai**
 “Nyadi semua sida ti di-iring ulih Roh Allah Taala nya anak Allah Taala” (Rom 8:14).
- d. Iya nyaup kitai ngambika Idup ngenyenangka ati Tuhan**
 “Tu reti utai ti ko aku: awak ka Roh Kudus ngatur pendiau kita, lalu anang nitih ka gaya pengidup mensia ti bedosa ari asal.” (Galatia 5:16. Pedana mega ba ayat 5:17-25).
- e. Iya nyaup kitai besampi.**
 “Baka nya mega Roh Kudus datai nyaup kitai, laban kitai lemi. Laban kitai enda nemu ni jalai kitai patut besembang; Roh Kudus empu minta ngagai Allah Taala ngari ka kitai, enggau jaku ti enda ulih dipereti kitai” (Rome 8:26).
- f. Iya meri pengidup ngagai tubuh kitai**
 “Lalu enti Roh Allah Taala, iya ti ngangkat ka Jesus ari mati, diau ba kita, nya alai iya ti ngangkat ka Kristus ari mati tentu mega deka meri pengidup baru ngagai tubuh kita, ulih Roh Kudus iya ti diau dalam tubuh kita” (Rome 8:11).
- 2. Nyaga Orang Ti Bepengarap**
 Kelimpah ari ngasuh Roh Kudus Iya diau ba orang ti arap ka Iya, Tuhan mega deka ngemenuh sereta maptisa orang ti arap enggau Roh Kudus dikena nyikap iya ngena kuasa dikena mela enggau ngemuliaka Tuhan ba dunya tu.
- a. Roh Kudus Meri Pengering Enggau Pemerani Dikena Besaksi**
 “Tang kita deka nyambut kuasa lebuh Roh Kudus nurun atas kita, lalu kita deka nyadi ka saksi aku di Jerusalem, di semua menua Judah enggau Samaria, enggau ngagai ujung dunya” (Kereja Rasul 1:8). Pedana mega ba Kereja Rasul 2:14-40.
- b. Iya Madah ka Perintah Ti Nyelai**
 “Nyadi mayuh macham pemerani ari Roh Kudus, tang pemerani nya diberi Roh Kudus siko aja.....”
 “Roh Kudus meri ka siko orang pesan ti penuh laban penemu dalam, lalu ngagai orang ti bukai, Roh Kudus nya tadi mega meri pesan ti penuh ulih pemandai. Siko Roh Kudus nya mega meri pengarap ngagai orang siko” lalu ngagai siko orang ti bukai iya meri kuasa kena nyuman orang. Roh Kudus meri ngagai siko orang kuasa kena ngaga kereja ajih; ngagai siko ti bukai meri pengelandik kena bejaku nusi pesan ari Allah Taala; lalu ngagai siko orang ti bukai meri penemu kena ngelala ka utai ti datai ari Roh Kudus enggau iya ti ukai ari Allah Taala. Ngagai siko orang iya meri penemu kena bejaku dalam jaku nyelai, lalu ngagai orang ti bukai iya meri penemu kena nerang ka jaku ti udah disebut” (1 Korint 12:4,8-10). Pedana mega ba Kereja Rasul 2:4; 10:46; 19:6.

c. Iya Nyadi Saksi Madahka Jesus Idup

“Allah Taala aki ini kami udah ngangkat ka Jesus ari mati.....Nyadi kami besaksi ka utai tu-kami enggau Roh Kudus, ti pemerai Allah Taala ngagai sida ti ngasi ka iya.” (Kereja Rasul 5:30-32). Pedana mega ba Kereja Rasul 4:31-33.

d. Iya Mai Penerang Ti Baru Ba Senentang Jaku Tuhan

Tang munyi ti udah disebut dalam Bup Kudus: “Utai ti nadai kala dipeda tauka didinga mensia, utai ti nadai kala diperagam dalam ati tau nyadi, nya meh utai ti udah disedia Allah Taala ka sida ti rindu ka Iya. Tang Allah Taala udah ngasuh utai ti dilalai ka iya temu kitai ulih Roh Kudus Iya. Roh Kudus ngabas semua utai, datai ka utai ti dalam peneka enggau tuju ati Allah Taala.” (1 Korint 2:9,10). Pedana mega ba John 16:13.

e. Iya Ngisi Roh Kitai Enggau Sembah Ti Bendar Ngagai Tuhan

“...tang kita patut penuh ulih Roh Kudus. Bejaku enggau pangan diri baka jaku ti dikena dalam Masmor, pantun enggau lagu ari Roh Kudus; nyanyi pantun enggau Masmor ka Tuhan, enggau jaku puji dalam ati kita.” (Epesus 5:18,19). Pedana mega ba John 4:24.

f. Iya Ngeninggi Ka Jesus

Tang lebu Maya Roh pemendar nya datai, Iya deka ngiring nuan tama ngagai pemendar.

“Tang lebu Roh Pemendar datai, Iya deka ngiring kita ngagai pemendar. Iya enda bejaku ka diri empu, tang Iya deka bejaku ngenang ka utai ti didinga iya lalu nusi ngagai kita pasal utai ti deka datai. Iya deka meri mulia ka aku, laban iya deka nyambut utai ti disebut aku lalu nusi ngagai kita. Semua utai ti dikemisi Apai aku enggi aku; nya kebuah aku ngumbai Roh Kudus deka nyambut utai ti disebut aku lalu nusi iya ngagai kita.” (John 16:13-15). Pedana mega ba John 15:26.

D. BAKANI CHARA DIBAPTISA ULIH ROH KUDUS

Tuhan ngasuh Roh Kudus diau dalam kitai laban kitai tu orang ti arap ka Jesus, ngisi kitai enggau penuh ngena kuasa dikena mela pengawa Tuhan.

1. Roh Kudus Ianya Pemerai Ti Dijanjika Tuhan, Lalu Minta Meh

“Apai ti di serega lebih agi deka meri Roh Kudus ngagai sida ti minta ari Iya!” (Luke 11:13b). Pedana mega ba ayat 9-12.

2. Berengkah Muji Tuhan Lebu Kita Nerima Iya Enggau Pengarap

“Sida nyembah Iya lalu pulai ngagai Jerusalem enggau ati ti balat andal. Sida seruran dalam Rumah Sembiang, muji Allah Taala” (Luke 24:52,53).

3. Kita Ulih Bejako Ngena Jaku Nyelai

“...Roh Kudus nurun atas sida. Sida bejako enggau jaku ti nyelai.....” (SPKR 19:6). Pedana mega ba Mark 16:17, Kereja Rasul 2:4; 10:45,46; 1 Korint 14:5,18.

TANGGUNG PENGAWA AKU

Aku berterima kasih ngagai Tuhan laban pemerai Roh Kudus ti bisi dalam aku. Diatu aku mutuska ati minta ajar sereta iring Roh Kudus. Aku mutus ati deka belajar ninga ari nyawa Roh Kudus ti bisi dalam ati aku. Aku milih deka dipenuhka enggau Roh Kudus. Diatu aku muka roh aku ngambika dipenuhka ulih Roh Kudus.